

# Bab 5

## BAB KELIMA

### PENUTUP

#### 5.1 KESIMPULAN

Bab ini merupakan bab yang terakhir yang mana penulis membuat rangkuman kesimpulan hasil daripada kajian yang dianalisis dalam bab-bab yang terdahulu. Juga dimuatkan saranan-saranan dan cadangan-cadangan yang berkaitan dengan tajuk pendekatan dakwah terhadap munafik.

Kesimpulan-kesimpulan yang dapat diambil dari bab-bab yang terdahulu adalah seperti berikut:

Satu) Munafik adalah seorang yang bermuka-muka memeluk Islam sedangkan di dalam hatinya kafir kerana sesuatu kepentingan tertentu.

Dua) Munafik adalah musuh Islam dalam selimut.

Tiga) Munafik sentiasa mencari ruang untuk melakukan keburukan dan merosakkan Islam.

Empat) Sifat nifak akan sentiasa tumbuh dalam jiwa manusia tanpa terkecuali.

Ini kerana kejadian manusia itu sendiri yang disertai nafsu yang sentiasa mendorong kepada kejahatan.

Lima) Munafik terbahagi kepada dua iaitu munafik iktikad dan munafik amalan. Munafik iktikad adalah kafir yang paling buruk. Sementara munafik amalan akan tetap mendapat balasan buruk di akhirat.

Enam) Munafik pada zaman Rasulullah ﷺ adalah kafir sebagaimana yang terjelas dalam bab ke 3.

Tujuh) Al-Quran telah menyatakan kaedah pendekatan dakwah kepada munafik dengan begitu jelas sekali. Ini menunjukkan Islam memberi ruang yang luas kepada munafik untuk bertaubat dari kesalahan mereka.

Lapan) *Ushub* yang digunakan oleh Al-Quran kepada munafik adalah keras dan tegas. Ini sebenarnya amat bersesuaian dengan sikap keras kepala mereka terhadap Islam.

Sembilan) Sifat nifak akan berlaku kepada sesiapa sahaja namun, setiap orang Islam wajib menjauhi dan memohon ampun kepada Allah ﷺ terhadap kelemahan mereka.

Sepuluh) Cara untuk menjauhi kemunafikan ialah dengan melazimi diri untuk berpegang teguh dengan agama Allah (الله ، ﷺ) dan mengikut sunnah Rasulullah (صَلَّى اللَّهُ عَلَيْهِ وَسَلَّمَ). Jika tidak begitu, maka seseorang itu sebenarnya sudah tertipu dengan diri sendiri.

Sebelas) Al-Quran telah menggariskan beberapa *ushub* dakwah kepada munafik. *Ushub-uslub* ini bertujuan untuk membuktikan bahawa Al-Quran mendakwahkan seluruh golongan manusia kepada Islam. Dakwah kepada munafik sudah pasti bertujuan untuk mengislamkan mereka di mulut dan hati sekaligus. Ini kerana mereka hanya “Islam” di mulut tetapi kufur di dalam hati. Dengan sebab itu mereka tetap kafir.

*Uslub-uslub* tersebut ialah dakwah kepada tauhid, *mujādalah*, *al-taghrīb* dan *al-tarhib*, pendedahan sifat-sifat munafik, *tarbiah* dan *ta'lim* dan kisah-kisah Al-Quran.

Perlu dijelaskan di sini bahawa kemunafikan sama ada banyak atau sedikit adalah amat dikutuk oleh Islam. Al-Quran menggambarkan bahawa keadaan munafik dengan kedudukan yang paling hina.

Allah (الله) berfirman,

إِنَّ الْمُتَّافِقِينَ فِي الدُّرُكِ الْأَسْفَلِ مِنَ النَّارِ

*Maksudnya : Sesungguhnya orang-orang munafik itu (akan berada) di tempat yang paling bawah di dalam neraka.<sup>1</sup>*

Ini secara tidak langsung memberi gambaran bahawa kemunafikan adalah perkara yang amat buruk.

Oleh sebab itu, seharusnya umat Islam memberi perhatian yang berat terhadap kemunafikan kerana ia boleh berlaku kepada sesiapa sahaja.

---

<sup>1</sup> *al-Nisā'* 4 : 145.

## 5.2 SARANAN

Setelah penulis membuat kesimpulan terhadap data-data yang didapati dan dianalisis dalam bab yang telah lalu, penulis cuba mengetengahkan beberapa saranan yang diharap akan membantu umat Islam mengenali kemunafikan dan seterusnya menjauhi dan meninggalkannya dengan sebenarnya.

Sebagai umat yang diberi tugas dakwah, maka diharap kita dapat mengenali kumpulan sasar dakwah yang tidak terkecuali golongan munafik atau mereka yang dihinggapi sifat nifak dengan lebih berkesan.

Saranan ini melibatkan semua pihak terutama ibu bapa, guru, masyarakat, badan sukarela, media massa dan juga pihak kerajaan.

### 1- Ibu Bapa

A ) Pendidikan awal bagi kanak-kanak merupakan suatu hal yang penting dalam proses melahirkan mereka sebagai anak yang soleh. Oleh itu, ibu bapa perlu mendidik mereka terlebih dahulu dalam rangka mengenal dan mencintai Al-Quran, sentiasa mengimarahkan masjid, menelaah buku-buku agama dan sebagainya agar diteladaninya. Di tangan kedua ibu bapalah terletaknya berbagai corak warna yang akan dilakarkan kepada

anak-anaknya sebagaimana kata pepatah "melentur buluh biarlah dari rebungnya", mendidik anak-anak biarlah pada usia awalnya.

B ) Untuk mempercepatkan proses penghayatan terhadap aktiviti keagamaan, para ibubapa seharusnya mendidik anak-anak mereka bermula sejak dari umur 5 dan 6 tahun lagi. Langkah ini akan memudahkan mereka untuk menghayatinya apabila menjangkau usia remaja dan seterusnya terbiasa dengan amalan-amalan tersebut hingga timbul kesedaran untuk mengamalkannya dalam kehidupan sehari-hari.

C ) Pepatah melayu ada mengatakan " bapa borek anak rintik " yang bermaksud seorang anak akan mengikuti tingkah laku dan perangai kedua-dua ibu bapanya. Sekiranya ibu bapanya mengajar dan menunjukkan contoh teladan yang baik, sudah pasti anaknya juga akan menurutinya. Namun, jika ibu bapanya menunjukkan contoh yang buruk, tidak mustahil anaknya akan menunjukkan perangai yang lebih buruk lagi. Dengan itu, ibu bapa mempunyai pengaruh yang besar dalam membentuk peribadi anak-anaknya.

## 2. Guru-Guru

A ) Peranan guru amatlah penting memandangkan masa pendidikan di sekolah agak panjang jika dibandingkan di rumah.

B ) Pemerataan dan penekanan pendidikan moral sebaiknya bukan hanya di peringkat sekolah rendah sahaja bahkan hingga ke peringkat yang lebih tinggi lagi seperti institusi pengajian tinggi, maktab-maktab dan kolej-kolej yang pada akhirnya akan melahirkan para intelektual yang seimbang dalam semua segi sama ada dunia dan akhirat.

C ) Guru adalah merupakan “ *qudwah* ” iaitu contoh ikutan kepada para pelajarnya. Sejauhmana penghayatan guru terhadap ilmunya, maka sebanyak itulah juga buah ilmu yang akan memberi kesan terhadap pelajarnya. Dalam erti kata lain, sekiranya guru menunjukkan contoh negatif kepada pelajarnya, generasi yang akan lahir selepas itu akan turut rosak akhlak dan saksiahnya.

### 3. Masyarakat

A ) Para penggawa bagi setiap daerah, para imam masjid, penghulu-penghulu kampung dan mereka yang dikenali ramai oleh masyarakat bahkan orang-orang kenamaan seharusnya mewar-warkan sifat-sifat yang mulia sebagai qudwah agar masyarakat akan terdidik dalam menghayati amalan Islam dan menjauhi kemunafikan. Majlis-majlis ilmu yang berteraskan keimanan yang sebenar harus diperbanyak

kerana iaanya merupakan wasilah terpenting untuk mendidik masyarakat.

B ) Para imam dan penyelia agama hendaklah ‘turun padang’ dengan cuba menghampiri golongan yang ‘culas’ dari masjid. Ini berlaku terutamanya kepada golongan remaja. Mereka ini adalah saf pimpinan masa hadapan. Jika generasi ini sudah rosak maka boleh dibayangkan bahawa masyarakat Islam akan datang adalah masyarakat yang punah.

C ) ciri-ciri kemunafikan mesti diperkenal dan diketengahkan kepada masyarakat. Sebagai contoh, sifat olok-olok ialah mukadimah berbohong. Seseorang yang membiasakan diri dengannya akan mudah untuk berbohong kepada sesiapa sahaja. Begitu juga, masyarakat harus ditonjolkan dengan ikhlas dalam melakukan suatu amalan. Ini kerana nifak bermula dengan hati yang mempunyai tujuan-tujuan tertentu. Jadi, apabila seseorang mempunyai keikhlasan, maka kemunafikan akan lenyap.

#### 4. Badan Sukarelawan

A ) Badan Sukarelawan juga patut membuat perkhemahan yang berorientasikan akhlak mulia. Program rakan muda yang telah

dilancarkan oleh kerajaan memang positif namun, kita memerlukan suatu bimbingan yang lebih menjurus kepada Islam dan akhlak Islam.

B ) Selain dari itu, moto, kain rentang, papan tanda yang menjuruskan ke arah akhlak, dakwah dan amalan Islam harus dibangunkan dengan lebih banyak lagi. Ini kerana perkara sedemikian kelihatan didominasi oleh perkara-perkara sia-sia dan mungkar. Justeru, sebarang agenda yang boleh memartabatkan Islam dan umatnya harus dilakukan dengan bersungguh-sungguh.

## 5. Media Massa

A ) Majlis ilmu dan forum ilmiah tentang konsep dakwah wajar sentiasa disiarkan kepada umum. Ianya dapat membuka minda secara langsung atau tidak langsung tentang tugas seorang pendakwah kebenaran.

B ) Sebaiknya media cetak juga hendaklah mempelbagaikan jenis buku-buku dan penulisan lain yang membincangkan mengenai munafik dan bahayanya serta konsep dakwah di dalam Islam.

## 6. Kerajaan

- A) Pihak kerajaan hendak sentiasa menyediakan berbagai kemudahan dan peruntukan yang mencukupi kepada Unit Pembangunan Islam sama ada kemudahan yang berupa kenderaan, kakitangan mahupun kewangan (elaun) dan sebagainya.
- B ) Mewajibkan semua tempat awam dikumandangkan dengan Al-Quran, ceramah atau apa sahaja bentuk media Islam yang membina. Ini secara tidak langsung adalah suatu bentuk program pendidikan jangka panjang kepada masyarakat.
- C ) Kerajaan juga perlu bekerjasama dengan mana-mana pengusaha-pengusaha kilang swasta dan pertubuhan dakwah yang ada seperti Angkatan Belia Islam Malaysia (ABIM), Jemaah Islam Malaysia (JIM), Tabligh dan sebagainya agar wadah dan misi perjuangan mereka untuk meninggikan syiar Islam tercapai. Walaupun pendekatan dan corak yang dimainkan adalah berbeza antara satu sama lain tetapi apa yang penting ialah masyarakat Islam dapat menikmati intipati program-program yang dianjurkan.

### 5.3 PENUTUP

Jelasnya, Islam adalah agama yang amat sempurna dan global yang tidak melihat keturunan, pangkat dan darjat manusia.

Ini dapat ditanggapi dengan mudah kerana Islam adalah agama yang membawa rahmat kepada seluruh alam.

Oleh itu, dakwah kepada golongan munafik bertujuan agar kembali kepada kerahmatan dan pengampunan Allah (۲, ۱۸) di dunia dan akhirat. Tiada siapa yang mampu memberi jaminan kepada seseorang sama ada memasuki syurga atau neraka pada masa hidup di dunia ini. Dengan itu, munafik juga masih berpeluang memperolehi balasan syurga dengan syarat mereka bertaubat dengan sebenar-benar taubat kepada Allah (۲, ۱۹).

**Doa supaya dijauhkan sifat munafik**

اللهم إني أعوذ بك من العجز والكسل والبخل والهرم  
 والقسوة والغفلة والذلة والمسكنة وأعوذ بك من الفقر  
 والكفر والشرك والنفاق والسمعة والرياء وأعوذ بك من  
 الصمم والبكم والجنون والبرص والجذام وسيء الأسباب  
 ذكر ما يستحب للمرء التعود بالله جل وعلا من فساد  
 الدين والدنيا عليه بسوء عمره